

ତୀମଥୁଙ୍କ ନିକଟକୁ ପାଉଲଙ୍କ ଦ୍ଵିତୀୟ ପତ୍ର ତୀମଥୁତାଃତେ ପ୍ରେରିତ୍ ପାଉଲୁସ୍‌ଆଃ ଏଗାଃ ଚିଟାଉ ପାରିଚାଏ

ନେ ପୁଅ, ତୀମଥୁତାଃତେ ଅଲ୍ଲକାନ୍ ପାଉଲୁସ୍‌ଆଃ ଏଗାଃ ଚିଟାଉ ତାନାଃ । ତୀମଥୁତାଃତେ ଅଲ୍ଲକାନ୍ ଏଗାଃ ଚିଟାଉ ପାଉଲୁସ୍‌ଆଃ ଜୀଦାନ୍‌ରେୟାଃ ଚୁଣ୍ଡୁ ଦିପିଲିରେ ଅଲ୍ଲକାନ୍ ଚିଟାଉ ତାନାଃ । ନେ ଦିପିଲିରେ ପାଉଲୁସ୍ ରୋମ୍ ନାଗାରରେ ଜେହେଲ୍ଲକାନ୍ ତାଇକେନା ୧:୧୭ । ପାଉଲୁସ୍‌ଲଃ ତୀମଥୁଆଃ ପୁରାଃ ବୁଗିନ୍ ନାତା ତାଇକେନା ଆଡ଼ଃ ସବେନ୍ ଇମ୍‌ତା ଇନିଃକେ ହନ୍ ଲେକାଏ ଉଦୁବକାଇଜା ଫିଲିପିୟ ୨:୨୨;୧ ତିମଥୁ ୧:୨;୧:୧୮ ।

ପାଉଲୁସ୍‌ଆଃ ହରାତେ ମିହୁଡ଼କେ ଏସକାର୍ ଅଲ୍ଲକାନ୍ ଉପୁନିୟା ଚିଟାଉକଏତେ ନେଆଁ ହବାଅଃତାନା ମିଆଁଦ୍ । ଏଗାଃ ଆପିୟା ପୁଅ ହବାଅଃତାନା ୨ ତୀମଥୁ, ତିତସ୍, ଆଡ଼ଃ ଫିଲ୍‌ମନ୍ । ତୀମଥୁତାଃତେ ଏଗାଃ ଚିଟାଉ ଅଲ୍ଲତାଇକେନ୍ ଇମ୍‌ତା ରୋମ୍ ନାଗାରରେ ସାସାତି ହବାଅଃତାଇକେନା । ହବାସାକାଅଆଃ ନେଆଁ ନାଗେନ୍ତେ ପାଉଲୁସ୍ ଜେହେଲ୍ଲକାନ୍ ତାଇକେନାଏ ଆଡ଼ଃ ତୀମଥୁକେ ଦୁକୁ ସାହାଡ଼ିଙ୍ଗ୍‌ୟେ ନାଙ୍ଗ୍ କାଜିୟାଇ ତାଇକେନାଏ । ତୀମଥୁତାଃତେ ଅଲ୍ଲକାନ୍ ପାହିଲ୍ଲା ଚିଟାଉ ଲେକାତେ ପାଉଲୁସ୍ ତୀମଥୁକେ ହସଡ଼ ଇଡୁକଆଃ ବିଷାଏରେ ପୁରାଃ ଚେନେତାଅ କାଜିକ କାଜିକାଦା । ୧ ତିମଥୁ ୧:୧୭-୧୮ ପାଉଲୁସ୍ ତୀମଥୁକେ କାଜିୟାଃ ଯେ, ହିଜୁଃ ଦିପିଲିରେ ପୁରାଃ ଦୁକୁହାସୁରେୟାଃ ଦିପିଲି ମେନାଃ ୩:୧ ।

ପୁଅ ଭିଟାରରେ ତାଇକାନ୍ କାଜି

୧. ପାଉଲୁସ୍ ତୀମଥୁକେ ଜହାର୍ କାଜିତାନ୍‌ଲଃ ଇନିଃକେ ଜୀଉରେ କେଟେଦ୍ ଏମାଇତାନାଏ । ୧:୧-୧୮
୨. ତୀମଥୁକେ ଧିରାଜିରେୟାଃ ସାବୁଦ୍ ଏମ୍‌କେଦ୍‌ତେ ଉଦୁବେନ୍ ନାଗେନ୍ତେ ପାଉଲୁସ୍ ଜୀଉରେ କେଟେଦ୍ ଏମାଇତାନାଏ । ୨:୧-୧୩

- ୩. ପାଉଲୁସ୍ ତୀମଥ୍‌ଙ୍କେ ହୁପ୍‌ଡିଙ୍ଗ୍ ବିଷାଏରେ ଇନିତୁ ଏମାଇତାନା । ୨:୧୪-୨୭
- ୪. ହିନ୍ଦୁଃ ଦିପିଲି ବିଷାଏରେ ଚିର୍ଗାଲ୍‌କାନ୍ ତାଇନଃ ଆତଃ ସାର୍‌ତି ହରା ସାଲାଏ ନାଗେନ୍ତେ ଚେନେତାଅ ଏମେତାନାଏ । ୩:୧-୪:୮
- ୫. ପାଉଲୁସ୍ ତୀମଥ୍‌ଙ୍କେ ଆୟାଃ ଏସ୍‌କାର୍‌ରେୟାଃ କାଜିକ ଏମ୍‌କେଦ୍‌ତେ ଅନଲ୍ ଚାବାକେଦାଏ । ୪:୯-୨୨

^୧ ଆଇଙ୍ଗ୍ ପାଉଲୁସ୍, ଯୀଶୁ ଖ୍ରୀଷ୍ଟଆଃ କୁଲ୍‌କାନନିଃ ତାନିଙ୍ଗ୍ । ଆବୁ ଯୀଶୁ ଖ୍ରୀଷ୍ଟଲିଃ ମେସାକାନ୍ ହରାତେ ପାର୍‌ମେଶ୍‌ବାର୍‌ଆଃ ବାନାର୍‌ସା ଲେକାତେ ଯୀଶୁ ଖ୍ରୀଷ୍ଟରେ ଜୀଦାନବୁ ନାମାକାଦା । ଏନା ଉଦୁବ୍ ନାଗେନ୍ତେ ଆଇଙ୍ଗ୍ ପାର୍‌ମେଶ୍‌ବାର୍‌ଆଃ ମିନେଲେକାତେଇଙ୍ଗ୍ କୁଲ୍‌କାନା ।

^୨ *ଆଇଁୟାଃ ଦୁଲ୍‌ଡ୍ ହନ୍ ତୀମଥ୍‌ତାଃତେ ନେ ଚିଗାଉ ଅଲେତାନାଇଙ୍ଗ୍ ।

ଆପୁ ପାର୍‌ମେଶ୍‌ବାର୍ ଆତଃ ଆବୁଆଃ ଯୀଶୁ ଖ୍ରୀଷ୍ଟସାଃଏତେ ସାୟାଦ୍, ଲିବୁଇ ଆତଃ ଜୀଉସୁକୁ ଆମାଃ ହବାଅଃକା ।

ଧାନ୍ୟାବାଦ୍ ଏମଃ ଆତଃ ପାତିୟାରରେନ୍ ହବାଅଃ

^୩ ଆଇଁୟାଃ ହାଡାମ୍‌ହଡକଆଃ ଲେକା ଆଇଙ୍ଗ୍ ଫାର୍‌ତି ମନ୍‌ତେ ସେଝାଇତାନ୍ ପାର୍‌ମେଶ୍‌ବାର୍‌ଙ୍କେ ନିଦାସିଙ୍ଗି ବିନ୍ତିତାନ୍ ଇମ୍‌ତା ଆମ୍‌କେ ପାହାମ୍‌କେଦ୍‌ତେ ଆଇଙ୍ଗ୍ ପାର୍‌ମେଶ୍‌ବାର୍‌ଙ୍କେ ଧାନ୍ୟାବାଦ୍ ଏମାଇତାନିଙ୍ଗ୍ । ^୪ ଆଇଙ୍ଗ୍ ରାସକାତେ ପେରେଜଃକାଇଙ୍ଗ୍ ମେନ୍ତେ ଆମାଃ ମେଦ୍ ଦାଆଃ ପାହାମ୍‌ତାନଲିଃ ଆମ୍‌କେ ନେଲ୍ ନାଗେନ୍ତେଇଙ୍ଗ୍ ସାନାଙ୍ଗ୍ ତାନା । ^୫ *ଆମାଃ ବୁଡିମ୍‌ଠାଁ ଲଇସ୍ ଆତଃ ଆମାଃ ଏଙ୍ଗା ଇଉନିକିତାଃରେ ତାଇକାନ୍ ସାର୍‌ତି ବିଶ୍ୱାସ୍ ଆମାଃତାଃରେୟ ମେନାଃ ମେନ୍ତେ ଆଇଁୟାଃ ପୁରାଃ ବିଶ୍ୱାସ୍ ମେନାଃ, ଆମାଃ ଏନ୍ ସାର୍‌ତି ବିଶ୍ୱାସ୍ ବିଷାଏରେ ଆଇଙ୍ଗ୍ ଆୟୁମ୍‌କାଦା । ^୬ ଆଇଙ୍ଗ୍ ଆମାଃ ଚେତାନରେ ତିଃଇ ଦହକେଦ୍‌ତେ ବିନ୍ତିତାନ୍ ଇମ୍‌ତା ପାର୍‌ମେଶ୍‌ବାର୍‌ତାଃଏତେ ଅକ ବାର୍‌ଦାନ୍ ନାମାକାଦାମ୍ ଏନାକେ ଜୀହିଦ୍‌ଗି ଦହେମେ, ମେନ୍ତେଇଙ୍ଗ୍ ପାହାମ୍‌ଇଚିମେ ତାନା । ^୭ ଚିୟାଃତି ପାର୍‌ମେଶ୍‌ବାର୍‌ଦ୍ ବରଏଲେକାନ୍ ଆମ୍‌ ଆବୁକେ କାଏ

☆ **୧:୨** ୧:୨ ପ୍ରେରିଡ୍ ୧୭:୧. ☆ **୧:୫** ୧:୫ ପ୍ରେରିଡ୍ ୧୭:୧.

ଏମ୍, ମେନ୍ଦ ପେଡ଼େଃ, ଦୁଲ୍ଲାଡ୍ ଆଡ଼ଃ ରୁଗିନ୍ ସେଣ୍ଟାନ୍ରେନ୍ ଆମ୍ ଏମାକାଦ୍‌ରୁଆଏ ।

୮ ଏନାମେନ୍ତେ ଆରୁଆଃ ପ୍ରାଭୁଆଃ ବିଷାଏରେ ଗାଞ୍ଜା ଏମ୍ ନାଗେନ୍ତେ ଚାଏ ଆଇଙ୍ଗ୍ ଇନ୍‌ୟାଃ ନାଗେନ୍ତେ ଜେହେଲ୍‌କାନାଇଙ୍ଗ୍ ମେନ୍ତେ ଆଲମ୍ ଗିହୁଗଃଆ, ମେନ୍ଦ ପାର୍‌ମେଶ୍‌ବରଆଃ ପେଡ଼େଃତେ ସୁକୁକାଜି ନାଗେନ୍ତେ ଆଇଁୟାଃଲଃ ଦୁକୁ ସାହାତିଙ୍ଗ୍‌ୟେମେ । ୯ ଇନିଃ ଆରୁକେ ବାସ୍ତାଅକେଦ୍‌ରୁଆ ଆଡ଼ଃ ପାବିତାର୍ କେନେଡ଼ାତେ କେଡ଼ାକେଦ୍‌ରୁଆ, ଆରୁଆଃ ରୁଗିନ୍ କାମିକ ନାଗେନ୍ତେଦ କା ମେନ୍ଦ ଆୟାଃ ଉକେଶ୍‌ତେ ଆଡ଼ଃ ସାୟାଦ୍‌ତେ ରିକାକାଦା, ଏନ୍ ସାୟାଦ୍ ନେତାରେୟାଃ ମୁନ୍ ସିଦାରେ ଖ୍ରୀଷ୍ଟ୍ ଯୀଶୁରେ ଆରୁକେ ଏମାଦ୍‌ରୁଆ । ୧୦ ମେନ୍ଦ ନାହ୍‌ଆଃ ଆରୁଆଃ ଜୀଉ ବାସ୍ତାଅନିଃ ଯୀଶୁ ଖ୍ରୀଷ୍ଟ୍‌ଆଃ ହିନିଦୁଃ ହରାତେ ଉନ୍‌ଦୁବ୍‌ୟାନା, ଇନିଃ ଗନ୍‌ଏଃରାଃ ପେଡ଼େଃକେ ଚୁଶ୍ଟୁକେଦା ଆଡ଼ଃ ସୁକୁକାଜି ହରାତେ ଜାନାଅ ଜୀଦାନ୍‌ରାଃ ହରା ଉଦୁବ୍‌ୟାନା ।

୧୧ ଏନ୍ ସୁକୁକାଜି ଉଦୁବ୍‌କେଦ୍‌ତେ ଇଡୁନାଙ୍ଗ୍ ପାର୍‌ମେଶ୍‌ବର ଆଇଙ୍ଗ୍‌କେ ମିଆଁଦ୍ କୁଲ୍‌କାନ୍ ତେଲ୍ଲା ଲେକାନିଃ ଆଡ଼ଃ ଇଡୁନିଃଲେକାଏ ସାଲ୍‌କାଦିୟାଁ । ୧୨ ଏନା ନାଗେନ୍ତେ ଆଇଙ୍ଗ୍ ଦୁକୁ ସାହାତିଙ୍ଗ୍ ତାନ୍‌ରେୟ କାଇଙ୍ଗ୍ ବରତାନା । ତିୟାଃତି ଆଇଙ୍ଗ୍ ବିଶ୍ୱାସକାଇନିଃକେ ସାରିତାନାଇଙ୍ଗ୍ ଆଡ଼ଃ ଇନ୍‌ୟାଃ ତିଃଇରେଇଙ୍ଗ୍ ଜିମାକାନା । ଆଡ଼ଃ ଇନିଃ ଏମାକାଦିଙ୍ଗ୍ କାମିରାଃ ବାହାରମ୍‌କେ ରିକାଏ ନାଗେନ୍ତେ ମାରାଙ୍ଗ୍ ବିଚାର୍ ହୁଲାଇଙ୍ଗ୍ ଜାକେଦ୍ ଆଇଙ୍ଗ୍‌କେ ବାସ୍ତାଅ ନାଙ୍ଗ୍ ଇନିଃତାଃରେ ପେଡ଼େଃ ମେନାଃ, ଏନା ଆଇଙ୍ଗ୍ ପୁରା କେଟେଦ୍‌ତେଇଙ୍ଗ୍ ବିଶ୍ୱାସ୍‌ତାନା । ୧୩ ଆଇଙ୍ଗ୍ ଆମ୍‌କେ ଇଡୁକାଦ୍‌ମେ ସାର୍‌ତି କାଜିକକେ ଆମ୍ ନାମୁନାମ୍ ହବାଅଃଲେକା ପୁରା କେଟେୟାନ୍‌ଗି ସାବାକାମେ । ଅକ୍‌ନାଃତି ଯୀଶୁ ଖ୍ରୀଷ୍ଟ୍‌ରେ ବିଶ୍ୱାସ୍ ଆଡ଼ଃ ଦୁଲ୍ଲାଡ୍‌ତାନାଃ । ୧୪ ଆମ୍‌କେ ଜିମାକାଦ୍‌ମେ ରୁଗିନ୍ ବିଷାଏକେ ଆରୁତାଃରେ ତାଇନ୍‌ତାନ୍ ପାବିତାର୍ ଆମ୍‌ରାଃ ପେଡ଼େଃତେ ଏନାକେ ଯାଡ୍‌ନାଅ କେଦ୍‌ତେ ଦହେମେ ।

୧୫ ପୁଗେଲ୍ ଆଡ଼ଃ ହର୍ମଗିନସ୍ ମେସାକେଦ୍‌ତେ ଏସିଆ ପାର୍‌ଗାନ୍‌ରେନ୍ ସବେନ୍‌କ ଆଇଙ୍ଗ୍‌କେ ବାଗିକେଦିୟାଁ, ଏନା

☆ ୧:୧୧ ୧:୧୧ ୧ ତିମଥ୍ ୨:୭.

ଆମ୍ ସାରିତାନା । ^{୧୭} ଅନିସିଫରଆଃ ଅଡ଼ାଃରେନକକେ ପ୍ରାଭୁ ଦାୟା ଏମାକକାଏ, ଚିୟାଃଚି ଇନିଃ ପୁରାଃତେ ଆଇଙ୍ଗକେ ଜୀଉରାଡ଼େଃ ଏମ୍ନାଙ୍ ଆଡ଼ଃ ଜୀଉରେ ରାସ୍କା ଏମ୍ନାଙ୍ ହିଜୁଃକାନ୍ ତାଇକେନାଏ । ଆଇଙ୍ ଜେହେଲ୍‌କାନ୍‌ରେୟ ଇନିଃକେ କା ଗିହୁଃକିୟା । ^{୧୮} ରୋମ୍ ନାଗାର୍‌ତେ ସେଟେର୍‌ୟାନ୍‌ଚି ଇନିଃ ଆଇଙ୍ଗକେ କା ନାମ୍ ଜାକେଦ୍ ଦାଣ୍ଟାକେଦିୟାଏ । ^{୧୯} ମାରାଙ୍ ବିଚାର୍ ହୁଲାଙ୍‌ରେ ପ୍ରାଭୁ ଇନିଃକେ ଦାୟାକାଏ । ଏଫିସୁସ୍‌ରେ ଇନିଃ ଆଇଙ୍ଗକେ ପୁରାଃଚି ସୁସାର୍‌କେଦିୟା, ଏନା ଆମ୍ ବୁଗିଲେକାତେମ୍ ସାରିତାନା ।

୨

ୟୀଶୁ ଖ୍ରୀଷ୍ଟରେ ବିଶ୍ୱାସ୍‌ତାନ୍ ପାଲେଟାନ୍‌କ

^୧ ଏନାମେନ୍ତେ, ଏ ଆଇଁୟାଃ ଦୁଲାଡ୍ ହନ୍, ଯୀଶୁ ଖ୍ରୀଷ୍ଟରେ ତାଇନକେଦ୍‌ତେ ଆୟାଃ ସାୟାଦ୍‌ତେ ନାମଃତାନ୍ ପେଡ଼େଃରେ ପେଡ଼େୟେନ୍‌ମେ । ^୨ ଆଡ଼ଃ ପୁରାଃ ଗାଞ୍ଜାକଆଃ ସାମ୍‌ନାଙ୍‌ରେ ଆଇଙ୍ଗତାଃଏତେ ଆୟୁମାକାଦ୍ କାଜିକ, ଏଟାଃକକେ ଇଡୁ ଦାଡ଼ିଲେକାନ୍ ପାତିୟାରେନ୍ ହଡ଼କତାଃରେ ଜିମାଏମେ ।

^୩ ଯୀଶୁ ଖ୍ରୀଷ୍ଟଆଃ ମିଆଁଦ୍ ବୁଗିନ୍ ପାଲଟାନ୍‌ଲେକା ଆଇଁୟାଃଲଃ ଦୁକୁ ସାହାଡ଼ିଙ୍‌ୟେମେ । ^୪ ଜେତାଏ ପାଲଟାନ୍ କାମିରେ କାମିତାନ୍ ହଡ଼, ପାଲଟାନ୍‌କଆଃ ମାରାଙ୍‌ନିଃକେ ସୁକୁ ଏମ୍ ନାଗେନ୍ତେ ସାନାଙ୍‌ଆଃଏ, ଇନିଃ ଲାଡ଼ାଇ କାମି ବାଗିକେଦ୍‌ତେ ଏଟାଃ କାମିରେ କାଏ ମେସାନା । ^୫ ଜେତାଏ ଆଖ୍‌ଡ଼ାରେ ହାରାଜିତା ଏନେଃ ଇମ୍‌ତା ନିୟାମ୍ ଲେକା କାଏ ଏନେଃରେଦ୍, ଇନିଃ ମୁକୁଟ୍ କାଏ ନାମେୟା । ^୬ କେଟେଦ୍ କାମିତାନ୍ ଚାଷିକେ ପାହିଲା ଇରାକାନ୍ ଜ' ନାମଃଚି ଲାଗାଡ଼ିଙ୍‌ୟାଃ । ^୭ ଆଇଙ୍ କାଜିତାନ୍‌ତେୟାଃ, ବୁଗିଲେକାତେ ଉଡ଼ୁଇମେ, ଚିୟାଃଚି ପ୍ରାଭୁଦ୍ ନେ ସବେନ୍ କାଜିକ ଆର୍‌କାର୍‌ଉରୁମ୍ ନାଗେନ୍ତେ ପେଡ଼େଃ ଏମାମେୟାଏ ।

^୮ ଆଇଙ୍ ପ୍ରାଚାର୍‌କାଦ୍ ସୁକୁକାଜି ଲେକାତେ, ଗଜାକାନ୍‌କଏତେ ଜୀଉବିରିଦାକାନ୍ ଯୀଶୁ ଖ୍ରୀଷ୍ଟ, ଦାଉଦ୍ ରାଜାରାଃ କିଲି ତାନିଃ, ଇନିଃକେ ପାହାମିମେ । ^୯ ନେ ସୁକୁକାଜିକେ ଉଦୁବ୍‌ତାନ୍ ହରାତେ, ଆଇଙ୍ ଗୁଣ୍ଟାକାଦ୍‌ନିଃ ଲେକା ସିକିଡ଼ିତେ ତଲ୍‌ୟାନାକାଙ୍ ଆଡ଼ଃ

ଦୁକୁଇଁଙ୍କ ସାହାତିଙ୍ଗତାନା, ମେନ୍ଦ ପାରମେଶ୍ୱାରୁଆଃ କାଜି କା
ତଲିଃଆ । ୧୦ ଏନାନାଗେନ୍ତେ ପାରମେଶ୍ୱାରୁଆଃ ସାଲକାନ ହଡ଼କହ
ୟାଶୁ ଶ୍ରୀଷ୍ଟତାଃଏତେ ଜୀଉ ବାସ୍ତାଅ ଆତଃ ଜାନାଅ ଜାନାଅରେୟାଃ
ମାନାରାଙ୍ଗକ ନାମେକା, ଏନାମେନ୍ତେ ଆଇଙ୍ଗ ଇନ୍କୁ ନାଗେନ୍ତେ
ସବେନ୍ ଲେକାନ ଦୁକୁଇଁଙ୍କ ସାହାତିଙ୍ଗତାନା । ୧୧ ନେ କାଜି
ପାତିୟାରରେ ଲେକାଗିୟା,

“ଆରୁ ଇନିଃଲଃ ଗଜାକାନରେଦ,

ଆରୁହ ଇନିଃଲଃରୁ ଜାହିଦଃଆ ।

୧୨ *ଆରୁ ଇନିଃଲଃ ଦୁକୁ ସାହାତିଙ୍ଗରେଦ,

ଆରୁହ ଇନିଃଲଃରୁ ରାଇଜେୟା,

ଆରୁ ଇନିଃକେ କାଲେ ସାରିୟା ମେନ୍ତେବୁ କାଜିରେଦ,

ଇନିଃହ ଆରୁକେ କାଇଙ୍ଗ ସାରିୟା ମେତାରୁଆଏ ।

୧୩ ଆରୁ ପାତିୟାରଃଲେକା କା ତାଇନ୍ରେୟ,

ଇନିଃ ପାତିୟାରଃ ଲେକାଗି ତାଇନାଏ,

ତିୟାଃତି ଇନିଃ ଆପାନ୍କେଗି କାଇଙ୍ଗ ସାରିୟା ମେନ୍ତେ କାଜି

କାଏ ଦାଡ଼ିୟା ।”

ବିଶ୍ୱାସ୍ତେ କାମିତାନକ

୧୪ ଆମାଃ ସବେନ୍ ବିଶ୍ୱାସୀକକେ ନେ ସବେନ୍ ବିଷାଏ ପାହାମ୍
ଇତିକମେ ଆତଃ ଧାରାମ୍ ପୁଅ୍ରେୟାଃ କାଜି ଇଡୁକେଦ୍ତେ କା
ବୁଗିନ୍ତେୟାଃକ ଆତଃ ଜିୟନଃ ଲେକନାଃକ କା ଏପେଗେର୍
ନାଗେନ୍ତେ ଇନ୍କୁକେ ପାରମେଶ୍ୱାରୁଆଃ ସାମ୍ନାଙ୍ଗରେ
କେଟେୟାନ୍ଗି ଆରୁକମେ । ୧୫ ଆମ୍ ଆମ୍କେଗି ପାରମେଶ୍ୱାରୁଆଃ
ଆୟାରରେ ମାଇନ୍ ନାମେନିଃ ଲେକାମ୍ ହବାଅଃ ସାନାଙ୍ଗରେଦ,
ଆମ୍ କା ଗିହୁଃକେଦ୍ତେ ପାରମେଶ୍ୱାରୁଆଃ ସାର୍ତି କାଜିକ ମାଇନ୍
ନାମେନିଃ ଲେକା ଇଡୁକମ୍ । ୧୬ ମେନ୍ଦ ସାମାକାଜିକଏତେ ଆତଃ
ଡ଼ଣ୍ଡ କାପ୍ଜିଏତେ ସାଙ୍ଗିନ୍ରେ ତାଇନ୍ମେ, ତିୟାଃତି ଜେତାଏ
ଏନାରେ ତାଇନ୍କାନକ ପାରମେଶ୍ୱାରୁତାଃଏତେ ଆତଃଗି ସାଙ୍ଗିନ୍
ଇଦିୟଃଆକ । ୧୭ ଆତଃ ଇନ୍କୁଆଃ ଇନିଡୁ ସୟା ଘାଅଲେକା
ପାସ୍ତାଅ ଇଦିୟଃଆ । ଇନ୍କୁଏତେ ହୁମ୍ନାୟ ଆତଃ ଫିଲିଡୁସ୍,

ନେ ବାରାନ୍‌କିନ୍ ତାନ୍‌କିନ୍ । ^{୧୮} ଇନ୍‌କିନ୍ ଜୀଉବିନିରିଦ୍ ହବାୟାନା
 ମେନ୍ତେ କାଜିକେଦ୍‌ତେ ସାର୍‌ତି ହରା ବାଗିକାଦାକିନ୍, ଆତଃ ଚିମିନ୍
 ହଡ଼କଆଃ ବିଶ୍ୱାସ୍ ଜିୟନାକାନା । ^{୧୯} ଏନ୍‌ରେୟ ପାର୍‌ମେଶ୍ୱାର୍‌ଆଃ
 ମାନ୍‌ରୁଦ୍ ନିହିଁ ଗାତା ତିଜ୍ଞୁଆକାନା, ଆତଃ ଏନାରେ ନେ କାଜି
 ଅଲ୍‌କାନା, “ପ୍ରାଭୁ ଆୟାଃ ହଡ଼କକେ ସାରିୟାଏ, ଆତଃ ଜେତାଏ
 ଆଇଙ୍ଗ୍ ପ୍ରାଭୁଆଃ ହଡ଼ ତାନିଙ୍ଗ୍ ମେନ୍ତେ କାଜିନିଃ ଏଡ଼କାନ୍
 କାମିକଏତେ ସାଙ୍ଗିନ୍‌ରେ ତାଇନଃ ଲାଗାତିଙ୍ଗ୍‌ୟାଃ ।”

^{୨୦} ମିଆଁଦ୍ ମାରାଙ୍ଗ୍ ଅଡ଼ାଃରେ ସୋନା ଆତଃ ରୁପାତେ
 ବାଇୟାକାନ୍ ତୁବ୍‌ହା ଏସ୍‌କାର୍ କା ତାଇନା, ମେନ୍‌ଦ ଦାରୁରାଃ
 ଆତଃ ହାସାରାଃ ବାଇୟାକାନ୍ ତୁବ୍‌ହାହଗି ତାଇନାଃ, ଚିମିନ୍‌ତେୟାଃ
 ପାରାବ୍‌ରେ ମାଇନ୍ ଏମ୍ ନାଙ୍ଗ୍ ଆତଃ ଚିମିନ୍‌ତେୟାଃ ସବେନ୍ ହୁଲ୍‌ଙ୍ଗ୍
 ନାଙ୍ଗ୍ ବାଉରାଅ ତାନା । ^{୨୧} ଜେତାଏ ଏନ୍ ଏଡ଼କାନ୍ କାମିକଏତେ
 ଆପାନ୍‌କେ ଫାର୍‌ଚିନ୍‌ତାନ୍ ହଡ଼ ପାବିତାର୍‌କାନାଏ, ଆତଃ ଇନିଃ
 ପାର୍‌ମେଶ୍ୱାର୍‌ଆଃ ବିଶେଷ୍ କାମିନାଙ୍ଗ୍ ବେଭାରଃଆଏ, ଚିୟାଃଚି
 ଇନିଃ ଆୟାଃ ଗମ୍‌କେୟାଃ ବେଭାରଃ ନାଗେନ୍ତେ ଜିମାକାନ୍, ଆତଃ
 ସବେନ୍ ବୁଗିନ୍ କାମି ନାଙ୍ଗ୍ ସେକାଡ଼ାକାନ୍‌ଗି ତାଇନାଃ । ^{୨୨} ମେନ୍‌ଦ
 ଆମ୍ ଜାଞ୍ଜାନ୍ ସାମାଏରାଃ ଏଡ଼କାନ୍ ସାନାଙ୍ଗ୍‌କଏତେ ସାଙ୍ଗିନେନ୍‌ମେ,
 ଅକନ୍‌କ ଫାର୍‌ଚି ମନ୍‌ତେ ପାର୍‌ମେଶ୍ୱାର୍‌ତାଃରେ ବିକ୍ରିତାନ୍‌କଲଃ
 ଧାରାମ୍, ବିଶ୍ୱାସ୍, ଦୁଲ୍‌ଲାଡ଼, ଆତଃ ଜୀଉସ୍ତୁକୁ ହବାଅଃନାଙ୍ଗ୍ କାମିମେ
 । ^{୨୩} ମେନ୍‌ଦ ଡ଼ଣ୍ଡୁ ଆତଃ କା ଲାଗାତିଙ୍ଗ୍ କାପ୍‌ଜିକଏତେ ସାଙ୍ଗିନ୍‌ରେ
 ତାଇନ୍‌ମେ, ଏନାଏତେଦ ଏପେରାଙ୍ଗ୍ ଅମନଆଃ ଏନାଦ ସାରିତାନାମ୍
 । ^{୨୪} ପ୍ରାଭୁଆଃ ଦାସି ହବାକେଦ୍‌ତେ ଏପେରାଙ୍ଗ୍ ନାଙ୍ଗ୍ କା
 ବୁଗିନାଃ, ମେନ୍‌ଦ ଇନିଃ ସବେନ୍‌କଆଃ ନାଙ୍ଗ୍ ଲେବେଃ ମନ୍‌ତେ
 ସାହାତିଙ୍ଗ୍‌ତାନ୍‌ଲଃ ବୁଗିଲେକା ଇଡୁକକାଏ । ^{୨୫} ଆତଃ ଆୟାଃ
 ବିରୁଧ୍‌ରେ ତାଇନ୍‌ତାନ୍ ହଡ଼କକେ ଲେବେଃମନ୍‌ତେ ବୁଝାଅକକାଏ,
 ଏନାରେଦ ଇଦୁ ପାର୍‌ମେଶ୍ୱାର୍ ଇନ୍‌କୁକେ ହେୟାତିଙ୍ଗ୍ ନାଙ୍ଗ୍ ଆତଃ
 ସାର୍‌ତି ବିଷାଏ ସାରି ନାଙ୍ଗ୍ ନେତା ଏମାକଆଏ । ^{୨୬} ଆତଃ ସାଏତାନ୍
 ଅକନ୍‌କକେ ଆୟାଃ ସାନାଙ୍ଗ୍‌ଲେକା କାମି ନାଗେନ୍ତେ ତଲ୍‌କାଦ୍‌କ
 ତାଇକେନାଏ, ଇନ୍‌କୁ ଆକଆଃ ତେତା ନାମ୍‌କେଦ୍‌ତେ ସାଏତାନ୍‌ଆଃ
 ଫାଁସ୍‌ହେତେକ ରାଡ଼ାଅଃଆ ।

୩

ରୁଣ୍ଡ ଦ୍ଵିପିଲି

୧ ଫେନଦ୍ ନେୟାଁ ସାରିମେ, ରୁଣ୍ଡ ହୁଲାଙ୍ଗକରେ ପୁରାଃ ବରଞ୍ଚାନ୍ ଦିପିଲି ହିନ୍ଦୁଃଆ । ୨ ଚିୟାଃଚି ହଡ଼କ ଆପ୍ନାଃ ନାଙ୍ଗ୍ ଏସ୍କାର୍ ଉଡ଼ଗୁଃକ, ଟାକା ପାଏସାରାଃ ହାୟା, ଘାମାଣ୍ଡ, ହାଁକାର୍, ନିନ୍ଦା କାଜି, ଏଙ୍ଗା ଆପୁକେ କା ମାନାତିଙ୍ଗ୍, ମାଇନ୍ କା ଏମ୍, ସଡ଼ରାକାନ୍କ, ୩ ଦୁଲାଡ଼୍ ବାନଃକ, ଦାୟା ବାନଃକ, ଏଟାଃନିୟାଃ ବିରୁଧ୍ରେ ନିନ୍ଦା କାଜିକ, ଆପାନ୍କେଗି ଆବର୍ରେ କା ଦହ ଦାଡ଼ିକ, ପୁରାଃଚି ଡିଟ୍ଟକ, ଇନ୍କୁ ବୁଗିନାଃତେୟାଃକ ହିଲାଙ୍ଗ୍‌ୟେଆ । ୪ ଇନ୍କୁ ବାଏମାନ୍କ, କା ଚେଡ଼ଗାର୍‌କ ହବାଅଃଆ ଆଡ଼ଃ ପାର୍‌ମେଶ୍ଵାରିକେ ଦୁଲାଡ଼୍ ବାଗିକେଦ୍‌ତେ ରିଜ୍‌ରାଙ୍ଗ୍‌ରେକ ତାଇନା । ୫ ଇନ୍କୁ ଧାରାମ୍‌ରେୟାଃ କାଜିକ ସାବେୟା, ଫେନଦ୍ ଧାରାମ୍‌ରେୟାଃ ସାର୍‌ତି ପେଡ଼େଃକେ କାକ ମାନାତିୟାଃ, ନେ ଲେକାନ୍ ହଡ଼କଏତେ ସାଙ୍ଗିନ୍‌ରେ ତାଇନ୍‌ମେ । ୬ ଚିୟାଃଚି ନିକୁଦ ଚିମିନ୍ ହଡ଼କଆଃ ଅଡ଼ାଃତେ ସେନ୍‌କେଦ୍‌ତେ କା ପେଡ଼େୟାନ୍ କୁଡ଼ିକକେ, ଅକନ୍‌କଟି ଆକଆଃ ପାପ୍‌ତେ ଲାଦିୟାକାନ୍ ଆଡ଼ଃ ସବେନ୍ ଲେକାନ୍ ଏଡ଼କାନ୍ ସାନାଙ୍ଗ୍‌ତେ ପେରେଜାକାନ୍‌କକେ ଆକଆଃ ଆକ୍‌ତେୟାର୍‌ରେକ ଦହକତାନା । ୭ ନେ କୁଡ଼ିକ ସବେନ୍ ଇମ୍‌ତା ଇଡୁନ୍‌ତାନ୍‌ରେୟା ସାନାର୍‌ତିରାଃ ସେଣାଁ ଚିଡ଼ଲାହ କାକ ସାରି ଦାଡ଼ିୟାଃ । ୮ ଯନ୍ନାସ୍ ଆଡ଼ଃ ଯମ୍‌ସ୍ ମୁଣାରାଃ ବିରୁଧ୍ରେକିନ୍ ଡିଙ୍ଗୁକାନ୍ ତାଇକେନା, ଏନ୍‌ଲେକାଗି ନେ ହଡ଼କଆଃ ମନ୍ କାମି କାଏ ଏମେୟା, ଆଡ଼ଃ ସାନାର୍‌ତିରାଃ ବିରୁଧ୍ରେକ ଡିଙ୍ଗୁନାଃ ଆଡ଼ଃ ଇନ୍କୁଆଃ ଧାରାମ୍‌ରେୟାଃ ବିଶ୍ଵାସ୍ କା ପକ୍‌ତାକାନା । ୯ ଫେନଦ୍ ଇନ୍କୁ ଥ୍ଵା ସାଙ୍ଗିନ୍ କାକ ସେନ୍ ଦାଡ଼ିୟା, ଚିୟାଃଚି ଏନ୍ ବାରାନ୍‌କିନ୍ ଚିମିନ୍ ଡଣ୍ଡ ତାନ୍‌କିନ୍, ଏନା ସବେନ୍‌କ ସାରିକେଦା, ଏନ୍ ଲେକାଗି ଇନ୍କୁଆଃହଚି ସବେନ୍‌କ ସାରିୟା ।

ରୁଣ୍ଡ କ୍ଵାଜି

୧୦ ଫେନଦ୍ ଆମ୍ ଆଇଁୟାଃ ଇନିଡୁ, ଚାଇଲ୍ ଚାଲାନ୍, ଆଡ଼ଃ ଆଇଁୟାଃ ଜୀଞ୍ଚାନ୍ ହରାକେ ଅଡ଼ଙ୍ଗାଦାମ୍ । ଆଇଁୟାଃ ବିଶ୍ଵାସ୍,

ଧୂରାଜ୍ଞ, ଦୁଲ୍ଲାଭ, ସାହାତିକ୍ଷ ଜୀଞ୍ଜାନ୍, ^{୧୧} ✨ଆଇଁୟାଃ ସାସାତି, ଆତଃ ଦୁକୁକେମ୍ ଆଟ୍ଟକାରକାଦା । ଆଇଁୟାଃ ଚେତାନରେ ଆକ୍ତିୟୋଖ୍, ଇକନିୟା ଆତଃ ଲୁସ୍ତ୍ରାରେ ହବାଲେନ୍ ବରଞ୍ଜାନ୍ ଦୁକୁ ସାସାତିକଇକ୍ଷ୍ ସାହାତିକ୍ଷକେଦା । ମେନ୍ଦ ଏନ୍ ସବେନାଃଏତେ ପାରମେଶ୍ଵାର୍ ଆଇକ୍ଷ୍କେ ବାଞ୍ଛାଅକେଦିୟାଃ । ^{୧୨} ଯୀଶୁ ଖ୍ରୀଷ୍ଟୁଆଃ ମେନେସାରେ ଧାରାମ୍ ଜୀଞ୍ଜାନ୍ ବିତାଅ ନାକ୍ ସାନାକ୍ତାନ ସବେନକ ଦୁକୁ ସାସାତିକ ନାମେଗିୟା । ^{୧୩} ମେନ୍ଦ ଏଡକାନ୍ ହଡକ ଆତଃ ବେଦା ହଡକ ପୁରାଃଗି ଏଡକାନ୍ରେକ ସେନା ଆତଃ ଏଟାଃକକେ ବେଦାତାନଲଃ ଆକ ଆକଗିକ ବେଦାଅଃଆ । ^{୧୪} ମେନ୍ଦ ଆମ୍ ସାର୍ତି ବିଷାଏ ଇଡୁକାନ୍ତେୟାଃ ପୁରାଃତେ ବିଶ୍ଵାସତାନାମ୍, ଏନ୍ ସବେନାଃରେ ପକ୍ତାକାନ୍ମେ । ଚିୟାଃତି ଆମ୍କେ ଇଡୁକାନ୍ମେ ହଡକକେ ଆମ୍ ସାରିତାନାମ୍ । ^{୧୫} ଆତଃ ଯୀଶୁ ଖ୍ରୀଷ୍ଟୁଆଃରେ ବିଶ୍ଵାସକେଦ୍ ହରାତେ ଜୀଉ ବାଞ୍ଛାଅ ନାକ୍ ଆମ୍କେ ସେଣାଁ ଏମ୍ ଦାଡିୟାଏ, ଏନା ଆମ୍ ମିଦ୍ ହୁଡିକ୍ଷଏତେ ଧାରାମ୍ପୁଅରେମ୍ ସାରିକାଦା । ^{୧୬} ଧାରାମ୍ପୁଅରେ ଅଲ୍ଲକାନ୍ ସବେନାଃ ପାରମେଶ୍ଵାର୍ଆଃ ସାହେଦ୍ତେ ଏମାକାନା, ସାର୍ତି ଇନିଡୁ ନାକ୍, ଭୁଲ୍ତାନକକେ ଏଗେର୍, କାଜି ବାଇରୁହାଡ୍, ଆତଃ ଧାରାମ୍ ଲେକାତେ ଜୀହୁଦଃ ନାକ୍ ଆରୁଆଃଏ, ^{୧୭} ଏନାତେ ପାରମେଶ୍ଵାର୍କେ ସେଞ୍ଜାତାନ୍ ହଡକ ପକ୍ତାକେଦ୍ତେ, ସବେନ୍ ଲେକାନ୍ ବୁଗିନ୍ କାମି ନାଗେନ୍ତେ ସେକାଡକାନ୍ଗି ତାଇନ୍ ଦାଡିୟାକ ।

୪

^୧ ଆଇକ୍ଷ୍ ପାରମେଶ୍ଵାର୍ଆଃ ସାମ୍ନାକ୍ରେ ଆତଃ ସବେନ୍ ଜୀନିଦ୍ ଆତଃ ଗଜାକାନ୍କଆଃ ବିଚାର୍ ନାଗେନ୍ତେ ଆତଃ ରାଇଜ୍ ରିକାଏ ନାଗେନ୍ତେ ହିଜୁଃତାନ୍ ଯୀଶୁ ଖ୍ରୀଷ୍ଟୁଆଃ ସାମ୍ନାକ୍ରେ କିରିୟାତାନଲଃ ଆମ୍କେଇକ୍ଷ୍ ଆରୁମେତାନା । ^୨ ନେତାରେ ଚାଏ କା ନେତାରେ ସବେନ୍ ଇମ୍ତା ବାଚାନ୍ ଉଡୁବେମେ, ପୁରାଃ ସାହାତିକ୍ଷତେ ଇଡୁତାନଲଃ ମିସା ମିସା ଏଗେର୍କୁମେ ଆତଃ ମିସା ମିସା ବୁଗିନାଃ କାମିନାକ୍ ଜୀଉରେ ରାସ୍କା ଏମାକମେ ।

✨ ୩:୧୧ ୩:୧୧ ପ୍ରେରିଡ୍ ୧୩:୧୪-୫୨; ପ୍ରେରିଡ୍ ୧୪:୧-୭; ପ୍ରେରିଡ୍ ୧୪:୮-୨୦.

୩ ଚିୟାଃଚି ନେତା ସେଚେରାଃ, ଏନାରେ ହତକ ବୁଗିନ୍ ଇନିତୁ କାକ ଆୟୁମେୟା, ମେନ୍ଦ ଆକଆଃ ସାନାଙ୍ଗଲେକାକ ସେସେନା ଆତଃ ଆକଆଃ ନାଙ୍ଗ ହସଡ଼ ଇତୁକକେ ହୁଣ୍ଡିକଆକ, ଏନ୍ତେ ଇନକୁଆଃ ଇନିତୁକ ଆୟୁମେୟା । ୪ ଆତଃ ସାନାର୍ଚ୍ଚି କାଜି କା ଆୟୁମକେଦତେ ହତକଆଃ କାଥ୍ନି ଆୟୁମ୍ ନାଗେନ୍ତେ ମନ୍ଦକ ଏମେୟା । ୫ ମେନ୍ଦ ଆମ୍ ସବେନ୍ କାଜିକରେ ଚିର୍ଗାଲାକାନ୍ ତାଇନମେ, ଦୁକୁ ସାହାତିଙ୍ଗ୍‌ୟେମେ, ସୁକୁକାଜି ଉଦୁବତାନ୍ନିଆଃ କାମି କାମିମେ, ଆତଃ ପାର୍‌ମେଶ୍ଵାର୍‌ଆଃ ଦାସିଲେକା ସେଞ୍ଜାକାମି ପୁରାଏମେ ।

୬ ଆଇଙ୍ଗ୍ ଆଇଁୟାଃ ଜୀଞ୍ଜାନ୍‌କେ ଦାଣେଁ ଏମ୍‌ରେୟାଃ ନେତା ସେଚେରାକାନା, ଆତଃ ନାହାଁଃଚି ଆଇଁୟାଃ ନାଙ୍ଗ୍ ନେ ଜୀତକେ ବାଗିରେଆଃ ଦିପିଲି ସେଚେରାକାନା । ୭ ଆଇଙ୍ଗ୍ ଜୀଞ୍ଜାନ୍‌ରାଃ ଲାଡ଼ାଇରେ ବୁଗିଲେକାତେଇଙ୍ଗ୍ ଲାଡ଼ାଇକାନା, ଆତଃ ଜୀଞ୍ଜାନ୍‌ରାଃ ନିର୍ରେ ଚୁଣ୍ଡୁଜାକେଦ୍ ନିର୍ ସେଚେରାକାନିଙ୍ଗ୍, ଆଇଙ୍ଗ୍ ବିଶ୍ଵାସ୍ ଦହକାଦାଇଙ୍ଗ୍ । ୮ ଆତଃ ନାହାଁଃ ଆଇଁୟାଃ ନାଙ୍ଗ୍ ଧାରମାନ୍ ମୁକୁର୍ ଦହକାନା, ଏନା ଏନ୍ ମାରାଙ୍ଗ୍ ହୁଲାଙ୍ଗ୍‌ରେ ଧାରାମ୍‌ତେ ବିଚାର୍‌ତାନ୍ ପ୍ରାଭୁ ଆଇଙ୍ଗ୍‌କେ ଏମାଇୟାଁ ଆତଃ ଆଇଙ୍ଗ୍‌କେ ଏସ୍କାର୍ କା ମେନ୍ଦ ଆୟାଃ ହିନିଦୁଃକେ ଦୁଲାଡ଼ତେ ତାଙ୍ଗିକାଦ୍ ସବେନ୍‌କକେ ଏମାକଆ ।

ତୀମଥ୍ ନାଗେନ୍ତେ ପାଉଲୁସ୍‌ଆଃ ଏସ୍କାର୍ କାଜି

୯ ଆଇଁୟାଃତାଃତେ ଜାଲ୍‌ଦି ହିଦୁଃ ନାଗେନ୍ତେ ସେକାଡ଼ଃମେ । ୧୦ *ଚିୟାଃଚି ଦିମା ନାହାଁଃରାଃ ନେ ଅତେଦିଶୁମ୍‌କେ ଦୁଲାଡ଼କେଦତେ ଆଇଙ୍ଗ୍‌କେ ବାଗିକେଦିୟାଁ ଆତଃ ଥେସ୍କଲନିକାତେ ସେନଃକାନା । କ୍ରେସ୍କେନ୍‌ସ୍, ଗାଲାତିୟତେ ଆତଃ ତିତସ୍, ତାଲ୍‌ମାତିଆତେ ସେନଃୟାନା । ୧୧ *ଲୁକ୍ ଏସ୍କାର୍ ଆଇଁୟାଃଲଃ ମେନାଇୟା । ମାର୍କକେ ଆମାଃଲଃ ଆଉଞ୍ଜିମେ, ଚିୟାଃଚି ଇନିଃଦ ଆଇଁୟାଃ ସେଞ୍ଜା କାମିରେ ଦେଙ୍ଗା ଦାଡ଼ିୟା । ୧୨ *ଆଇଙ୍ଗ୍ ତୁଖ୍‌କକେ ଏଫିସୁସ୍‌ତେଇଙ୍ଗ୍

* ୪:୧୦ ୪:୧୦ କଲସିୟ ୪:୧୪; ଫିଲମନ୍ ୧:୨୪; ୨ କରିନ୍ଥ୍‌ୟ ୮:୨୩; ଗାଲାତିୟ ୨:୩; ତିତସ୍ ୧:୪. * ୪:୧୧ ୪:୧୧କଲସିୟ ୪:୧୪; ଫିଲମନ୍ ୧:୨୪; ପ୍ରେରିଡ଼ ୧୨:୧୨,୨୫; ୧୩:୧୩; ୧୫:୩୭-୩୯; କଲସିୟ ୪:୧୦; ଫିଲମନ୍ ୧:୨୪. * ୪:୧୨ ୪:୧୨ ପ୍ରେରିଡ଼ ୨୦:୪; ଏଫିସିୟ ୬:୨୧,୨୨; କଲସିୟ ୪:୭,୮.

କୁଲକିୟା । ୧୩ ☆ତ୍ରୋୟାସ୍ ସାହାରରେ ଆଇଙ୍ଗ୍ କାରପସ୍ତାଃରେ
 ବାରିକାଦ୍ ଲିଜାଃ ଆତଃ ପୁଅକହଗି ଆତତରସାଏମେ,
 ବିଶେଷକେଦ୍ତେ ଉହୁରତେ ବାଇୟାକାନ୍ତେୟାଃକେ ଆଉଝେମେ
 ।

୧୪ ☆ଆଲେକ୍ତାଣ୍ଡ୍ରା କାଁସାରି ଆଇଁୟାଃ ପୁରାଃ ଏଡ୍‌କାନାଃ
 ରିକାକାଦାଏ, ପ୍ରାଭୁ ଇନିୟାଃ କାମିଲେକା ନାଲା ଏମାଇୟାଏ ।
 ୧୫ ଆମ୍‌ହ ଇନିଃତାଃଏତେ ଚିର୍ଗାଲାକାନ୍ ତାଇନ୍‌ମେ, ଚିୟାଃତି
 ଇନିଃଦ୍ ଆରୁଆଃ କାଜିକ ପୁରାଃତେ କା ଆୟୁମ୍‌ତାନ୍‌ଲଃ
 କାଜିଛେକାଦ୍ ତାଇକେନାଏ ।

୧୬ ଆଇଁୟାଃ ପାହିଲା ଇଝାର୍ ଇମ୍‌ତା ଜେତାଏ ଆଇଙ୍ଗ୍‌କେ କାକ
 ଦେଙ୍ଗାକେଦିୟାଁ, ଆତଃ ସବେନ୍‌କ ବାରିକେଦିୟାଁ । ପାର୍‌ମେଶ୍ଵାର୍
 ଇନ୍‌କୁଆଃ ନେ ଗୁହ୍ନାଁ ଆଲକାଏ ଲେକାଏକା । ୧୭ ମେନ୍‌ଦ୍ ପ୍ରାଭୁ
 ଆଇଁୟାଃସାଃରେ ତିଙ୍ଗୁକେଦ୍ତେ ପେଡେଃ ଏମାଦିୟାଁଏ, ଆତଃ
 ଆଇଙ୍ଗ୍ କୁଲାତାଃଏତେ ବାଞ୍ଛାଅୟାନାଇଙ୍ଗ୍, ଜେ'ଲେକାଚି ଆଇଁୟାଃ
 ହରାତେ ସୁକୁକାଜି ପୁରାଃଗି ଉଦୁବ୍ ଦାଡ଼ିୟାଆ ଆତଃ ସବେନ୍
 ସାଅଁସାରକ ଏନା ଆୟୁମ୍ ଦାଡ଼ିୟାକ । ୧୮ ପ୍ରାଭୁ ଆଇଙ୍ଗ୍‌କେ ସବେନ୍
 ଏଡ୍‌କାନ୍ କାମିକଏତେ ବାଞ୍ଛାଅକେଦ୍ତେ ଟୁଣ୍ଡୁରେ ଆୟାଃ ସିର୍ମା
 ରାଇଜ୍‌ତେ ବୁଗିଲେକାତେ ଇଦିୟାଁ । ଇନିୟାଃ ମାନାରାଙ୍ଗ୍ ଜାନାଅ
 ଜାନାଅ ଜାକେଦ୍ ହବାଅଃକା ! ଆମେନ୍ ।

ଟୁଣ୍ଡୁ ଜହାର୍

୧୯ ☆ପ୍ରିସ୍‌କିଲା, ଆକ୍‌ଲିଆ ଆତଃ ଅନିସିଫର୍‌ଆଃ ଅଡ଼ାଃରେନ୍‌କକେ
 ଆଇଁୟାଃ ଜହାର୍ ଉଦୁବାକମେ । ୨୦ ☆ଏରାଷ୍ଟ୍ କରିନ୍ଥ୍‌ୟରେ
 ତାଇନ୍‌ୟାନାଏ । ମେନ୍‌ଦ୍ ତ୍ରଫିମରାଃ ହଡ଼୍‌ମ ବେଗ୍ କା ତାଇନ୍
 ହରାତେ ଆଇଙ୍ଗ୍ ଇନିଃକେ ମିଲିତସ୍‌ରେ ବାରିକେଦ୍ତେଇଙ୍ଗ୍
 ହିଜୁଃୟାନା । ୨୧ ରାବାଙ୍ଗ୍ ସାହା ସିଦାରେ ହିଜୁଃନାଙ୍ଗ୍ ସେକାଡେନ୍‌ମେ
 ।

☆ ୪:୧୩ ୪:୩୩ ପ୍ରେରିଡ୍ ୨୦:୬. ☆ ୪:୧୪ ୪:୧୪ ୧ ତିନିଧି ୧:୨୦; ରୋମି ୨:୬.
 ☆ ୪:୧୯ ୪:୧୯ ପ୍ରେରିଡ୍ ୧୮:୨; ୨ ତିନିଧି ୧:୧୬,୧୭. ☆ ୪:୨୦ ୪:୨୦ ପ୍ରେରିଡ୍ ୧୯:୨୨;
 ରୋମି ୧୬:୨୩; ପ୍ରେରିଡ୍ ୨୦:୪; ୨୧:୨୯.

ଇଉବୁଲ୍, ପୁଦେନସ୍, ଲାଇନାସ୍, କ୍ଲାଉଦିଆ ଆଡ଼ଃ ସବେନ୍
ବିଶ୍ୱାସୀ ହାଗା ମିଶିକ ଆମ୍ଭେ ଜହାର୍ ଆଡ଼ଃ ଇଶୁସାଏ
କାଜିକୁଲ୍‌କାଦାକ ।

^{୨୨} ପ୍ରାଭୁ ଆମାଃ ଆମ୍ଭାଲଃ ତାଇନକାଏ ।
ଆପେ ସବେନକଲଃ ସାୟାଦ୍ ହବାଅଃକା ।

ପାରମେଶ୍ଵରୀୟାଃ ଜୀନିଦ୍ ବାଚାନ୍
The New Testament in the Munda language of India:
ପାରମେଶ୍ଵରୀୟାଃ ଜୀନିଦ୍ ବାଚାନ୍

copyright © 2020 The Word for the World International

Language: ମୁଞ୍ଜା (Muṅḍa) (Munda)

Contributor: The Word for the World International

ପାରମେଶ୍ଵରୀୟାଃ ଜୀନିଦ୍ ବାଚାନ୍
ନାଞ୍ଜା ନିୟାମ୍ , 2020

The New Testament in Munda Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-13

PDF generated using Haiola and XeLaTeX on 22 Feb 2024 from source files dated 14 Apr 2023

903abb6b-97c3-582d-9df8-a6a8f2fce6d6